

პეტრე გელხვიძე

ხმა ზეციდან

(აზრები)

ქუთაისი 2023

პეტრე გელხვიძე - ხმა ზეციდან (აზრები)

ედვენება იუბილარ მეუღლეს, ლუბა გიორგის-ასულ ხარაბაძეს, რომელმაც თავისი 70 წლიანი ცხოვრებიდან 45 ჩვენი ოჯახის სილამაზეს, ქმარ-შვილის და ახლობელთა კეთილდღეობას მიუძღვნა. დაე, კიდევ მრავალი იუბილე და წარმატებული წლები იყოს მისი ლამაზი ცხოვრების თანამგზავრი.
/09.09.2023/.

ელ.ფ. petre.gelkhviidze@rambler.ru

ტ. (0431)267705;

მობ. 551932278

© პ.გელხვიძე 2023

- ❖ სიყვარულია ის ძალა, რომელიც აცოცხლებს ადამიანს.
- ❖ სიყვარულია უკვდავება; ადამიანებო, გაუფრთხილდით ერთმანეთს.
- ❖ სიყვარული ზეციური უნარია, ხოლო ბედნიერება ამ უნარის რეალიზაციის შედეგი!!!
- ❖ დღეს ჩვენთვის განათლებაა ის კბილები, რომლითაც შეიძლება მყარად ჩაეჭიდო ეპოქას (ათასწლეულს).
- ❖ „სუსტი ურთიერთქმედება“ - მატერიალური დაინტერესებით განპირობებული ურთიერთობა.

- ❖ „ძლიერი ურთიერთქმედება“ - სიყვარულზე დაფუძნებული ურთიერთობა.
- ❖ ღმერთი ჩვენი უსუსურობისაგან თავის დაღწევის და ჩვენივე ხსნის თავშესაფარია.
- ❖ ადამიანური მოვალეობების სხვებზე გადაბარება - პარალელურ სამყაროში გადასვლა.
- ❖ სიკვდილამდე ადამიანს მისი ცხოვრების არარაობის გაცნობიერება ანადგურებს.
- ❖ დღეს საქართველოში პატიოსნება უმწეობის სინონიმია.
- ❖ დიქტატორებს თავისი ბრწყინვალეების ძეგლი უვიცობის ბორცვზე აქვთ დადგმული.

- ❖ ღმერთმა ადამიანის სახით ისეთი სათამაშო შექმნა, რომელიც თავის თავს ვერასდროს გადაახტება და თუ გადაახტა ისეთ უფსკრულში აღმოჩნდება, საიდანაც ვერასდროს ამოვა.
- ❖ დამწერლობა - ისტორიაში სამოგზაურო ტრანსპორტი.
- ❖ შემოქმედება - შემოქმედის მიერ „საბრალოს“ მიმართ გაღებული წყალობა.
- ❖ შემოქმედების პროცესში მარტოობა არ არსებობს.
- ❖ ადამიანები საკუთარ წარუმატებლობის მიზეზს სხვაში უფრო სიამოვნებით ეძებენ, ვიდრე საკუთარ თავში.

- ❖ თუ წინსვლისას სიტუაციას ვერ აკონტროლებ, ძალზე ადვილია „თამაშვარე მდგომარეობაში“ აღმოჩნდე.
- ❖ გენიოსები, ათასწლეულების სასწოროთ იწონება.
- ❖ რომ არ გაგვევლო ჟამიანობა, „შენი ჭირიმე“, „შენ გენაცვალე“-ც არ გვექნებოდა.
- ❖ ვინმე, რომ გაზომ-აწონო, თუნდაც მინიმალურ საზომ ერთეულად უნდა გამოდგებოდე.
- ❖ ამ სამყაროში ყველაფერზე უდიდესი განძი სულიერებაა, რომლის გაზომ-აწონვა სიყვარულით შეიძლება.

- ❖ სიძუნწე- გაჭივრებაა და ორმაგად გაჭივრება, თუ ის ტვინითაა განპირობებული და არა ობიექტური გარემოთი.
- ❖ შერევა ყოველთვის ლოგიკას არ ექვემდებარება, ერთ წვეთ ძმარს უზარმაზარი ქვევრის დამმარება შეუძლია.
- ❖ საქართველოში ყველაფერში შეჯიბრია, მათ შორის იმაშიც კი, ვინ როგორ უფრო მეტად ავნოს ქვეყანას!
- ❖ ყველა დროში ქართული სახელმწიფოებრიობის მტრები „ოცდაათ ვერცხლად“ გაყიდული შინაური მტრები იყო.

- ❖ ამქვეყნად ყველა ცრემლებით მოდის, მაგრამ ბრილიანტებად ცრემლებისაგან ნათებას ერთეულები (მხოლოდ რჩეულები) ახერხებს.
- ❖ ცხოვრების აღმართზე ასვლაა ძნელი, თორემ ჩამოსრიალება თავისითაც ხდება.
- ❖ ჩვენთვის ჯერ სინამდვილე დგება და მერე ვიწყებთ მის გააზრებას, არადა ჯობდა გააზრებული და ვხვდებოდით სინამდვილეს!
- ❖ მთავარია კითხვის და ძახილის ნიშანი არ იყოს, თორემ წერტილი ყველას და ყველაფერს დაესმება.

- ❖ კითხვის და ძახილის ნიშნის დამსმელი კი არა, ის არის მაგარი, ვისაც წერტილის დასმა შეუძლია.
- ❖ თუ სხვისი დაფასება არ შეგიძლია, ეგ იმ სხვისთვის არაფერს არ ნიშნავს, და საერთოდ თუ სხვაში რაიმე კარგის დანახვა არ შეგიძლია, ეგ შენი გაჭივრებაა და არა სხვისი.
- ❖ შეკითხვა: ვისი უნდა ემინოდეს ყველაზე მეტად ნორმალურ ადამიანს? - საკუთარი თავის.
- ❖ სიმდიდრე ის კი არ არის რასაც ამქვეყნად დააგროვებ, არამედ ის, რასაც ამქვეყნად დააგროვებ, მაგრამ იმქვეყნად ვერ წაიღებ.

- ❖ ბედნიერი ხარ, თუ მხრებით დაგაქვს შენი „ტამარი“.
- ❖ ბუნებას უამრავი ყვავილი აქვს, ყველა ლამაზია, ასევეა ქალებიც და თუ ვინმე ამ სილამაზეს ვერ ხედავს, ეს მისი პრობლემაა და არა ბუნების.
- ❖ წიგნი, ღვინო და ქალი არ შეიძლება იყოს ცუდი. ცუდი შეიძლება იყოს მათდამი დამოკიდებულება გაუნათლებლობის და სიჩლუნგის გამო!!!
- ❖ ლამაზს კნინობითი ფორმა არ შეიძლება ქონდეს; არსებობს ლამაზი, ულამაზესი და ღვთიური.

- ❖ სიცოცხლის ხანგრძლივობა დროის ინტერვალით კი არ იზომება, არამედ ნაკეთები საქმით.
- ❖ ტვინი და პასუხისმგებლობის გრძობაა ამქვეყნად პატიოსანი კაცის სასჯელი.
- ❖ სამწუხაროდ, პოლიტიკოსები ძალაუფლების ხელში ჩაგდებად უსამართლობის წინააღმდეგ შეუპოვარი მებრძოლი.
- ❖ მადლიერებას ფრთები აქვს, უმადურობას ფესვები.
- ❖ ქალის შენიშვნა - „დაბერდიო“- სისხლის სამართლის დანაშაულის განაჩენზე უფრო მძიმეა.

- ❖ მე სიმკაცრის მომხრე კი არა, დამნაშავის დაუსჯელობის სასტიკი წინააღმდეგი ვარ.
- ❖ ადამიანს, რომ გენეტიკური კოდის ჯაჭვის სისტემა დაბლოკილი არ ქონდეს, სამყაროს საიდუმლოებებს გახსნიდა.
- ❖ მომავლის დასანახად წარსულში დაგროვილ საიდუმლოებათა (ცოდნის სისტემის) გასაღების მოძებნაა საჭირო.
- ❖ ადამიანის გონებაში ფაქტები „ფაილების“ სახითაა შენახული და რა სამწუხაროა, რომ ზოგიერთი მათგანის გახსნა ხშირად ვერ ხერხდება.
- ❖ სწრაფ პოპულარობას, დავიწყებაც შეიძლება სწრაფად მოყვეს.

- ❖ ცუდი საქციელი ეპიდემიაზე მეტად საშიშია!
- ❖ ალბათ, ამქვეყნად ყველაზე ადვილი, მორალის გარეშე ცხოვრებაა.
- ❖ ცხოვრებაში სულ იმის შიში მქონდა უზნეობის და ამორალობის საქვეყნოდ გამეფებულ ცუნამს არ გადაევილო ჩემზე და არ წაველეკე (არ ვიცი გავუძელი კი ამ შემოტევას??).
- ❖ ადამიანს უნდა (მ)აინტერესებდეს: -1) რა გა(ვ)ეცი; -2) ვის მი(ვ)ეცი (თუ ისევ შენიათს, გაცემულად ნუ ჩა(ვ)თვლი!); 3) თუ რაიმეს სანაცვლოდ, მაშასადამე, შე(ვ)ცდი!
- ❖ ახალგაზრდობა და სიბრძნე ასაკთან არ არის დაკავშირებული.

- ❖ მეცნიერული აზრი, რომელიც ახალ ამოცანებს არ ბადებს, მეცნიერულად არ ითვლება.
- ❖ ნულით ციფრის სტატუსის ამადლება (ან დადაბლება) მყისიერად ხდება.
- ❖ რელიგია მეცნიერებაა მაშინ, როცა სულიერებაზე მსჯელობს, ხოლო ხელისუფლებაა მაშინ, როცა ხალხის მორჩილების საკითხითაა დაკავებული.
- ❖ დანახული, მხოლოდ გონების თვალთ დანახვის შემდეგაა დანახული.
- ❖ მამდარი ლომის „ჰუმანურობისა“ არაფერია დასაჯერებელი.
- ❖ სასიყვარულო ურთიერთობას სიბნელე კი არა, ესაჭიროება სინათლე.

- ❖ არ ვიცი სამყაროში როგორ არის განაწილებული და დედამიწაზე კი უვიცობის და ავკაცობის უდაბნოს ბევრად მეტი ადგილი უჭირავს, ვიდრე აზროვნების და სიკეთის ოაზისს.
- ❖ ზოგჯერ ადამიანებს დინების საწინააღმდეგოდ უწევს სვლა, არა იმიტომ, რომ არ იცის დინების მიმართულება.
- ❖ ქართველი - ყველა შესაძლო ატრიბუტით შემკობილი (უკიდურესი უარყოფითი თვისებებიდან, უკიდურეს დადებით თვისებებამდე) - ილია ჭავჭავაძის წუხილი, ჭაბუა ამირეჯიბის განსჯა.
- ❖ წიგნი - საკაცობრიო საგანძურის სათავსო!

- ❖ სიყვარული სამყაროს უდიდესი საიდუმლოებაა, ამ საიდუმლოებას ორპოლუსიან სამყაროში მინიმუმ ორი არსება სჭირდება, ხოლო მაქსიმუმ ორი მოაზროვნე.
- ❖ რა დალუპავს კაცობრიობას? - მტრობა, ზიზღი და გაუტანლობა!!!
- ❖ რა გადაარჩენს კაცობრიობას? - შრომა, ერთგულება და სიყვარული!!!
- ❖ თუ არამზადას იმისათვის ებრძვი, რომ მისი ადგილი დაიკავო, მაშინ მასზე უფრო ორჯერ (და მეტად) არამზადა ხარ!
- ❖ სიბერე - სიახლისადმი დიდი სიფრთხილე და კონსერვატიზმი.

- ❖ ახალგაზრდობა - დაუოკებელი ჟინი დიდი მწვერვალების დაპყრობისა.
- ❖ ეფექტის არსი; ერთი ღერი თმის საშუალებით კარგად განისაზღვრება: /ერთი ღერი თმა მელოტი კაცის თავზე ღიმილის მომგვრელია, მაგრამ იგივე ერთი ღერი თმა, საკვებში ნაპოვნი კი უსიამოვნების და ზიზღის/.
- ❖ კაცობა, ცათამბჯენია და ბედნიერია ის, ვისაც ეს ცათამბჯენი მარადისობის (სიყვარულის) ფუნდამენტზე აქვს აგებული.
- ❖ ხელოვნებაშია სულის უკვდავება.
- ❖ თავი, ის ქვაბია, რომელშიც კარგად მოხარშულ აზრებს აქვს ფასი.

- ❖ რა საამური იქნება ცხოვრება ქვეყანაში, სადაც პოლიტიკოსის საქმიანობა მორალზე და სამართლიანობაზე იქნება დაფუძნებული!
- ❖ სამწუხარო რეალობით განპირობებული შეკითხვა: ყოველთვის არის თუ არა სამართლიანი ხალხის ნება? - ყოველთვის არა (პონტი პილატმა გაითვალისწინა ხალხის ნება და . . . მიიღო რა???, ქრისტე ჯვარზე გააკრეს!!!)
- ❖ „თეთრი შური“ - როგორც ყორანი ვერ გათეთრდება, ისე შური ვერ გათეთრდება.
- ❖ გამოღვიძება - ამქვეყნიური არარაობიდან გაცლა.

- ❖ პრინციპული ადამიანი პრინციპებს არ ღალატობს; ჯიუტი თავის სიჯიუტეს არ იშლის; - პრინციპულობა საქმეს შველის, სიჯიუტე კი საქმეს ვნებს!
- ❖ არაკომპეტენტური მოხელის მეთოდი: მოიცილე პრობლემის აღმომჩენი და პრობლემაც აღარ იქნება!
- ❖ მუზა - შეგონება ზეციდან.
- ❖ ინტელიგენტობა ის ღვთიური უნარია, რომლის გაზომ-აწონვა დიპლომებით ან კიდევ მატერიალური სიმდიდრით შეუძლებელია.
- ❖ ადამიანებისათვის ისტორიის კარი ღიაა, მაგრამ შიგ მხოლოდ ტვირთით შესულთათვის მოიძებნება ადგილი!